

## **Te Katauraoi n te Nakoanibonga: “I Kainnanao Am Ibuobuoki”**

Iroun Beretitenti Henry B. Eyring  
Moan Kauntira n te Moan Beretitenti

Tai raraoma n aki taun am konabwai n te bwai are ko rinanona ke n are ko iangoia, ma iangoa te bwai, ma ana ibuobuoki te Uea, ae ko na riki iai.

Tariu aika a tangiraki, bon te kukurei ngai n raoni ngkami n te bootaki ni kabuta n te aonaaba n ana nakoanibonga te Atua. N te tairiki aei N na taetae iaon te katauraoi n te nakoanibonga, i bon ibukira ao ibukiia ake ti na ibuobuoki ni katauraomia tabeman.

Angiia mai ibuakora ti miimi i bon iroura n tabetai, “I tauraai ibukin te mwakuri n te nakoanibonga?” Au kaeka, “Eng, I bon katauraai” Tibwangau n te bong aei bwa n na buokiko n ataia bwa te katauraai ao karekean te ninikoria mai iai.

Ngkai ko ataia, te Nakoanibonga n te Aaron e katabuaki bwa te katauraai n nakoanibonga. Angiia kaaina bon man te nakoanibonga ae te Aaron aika bon riikan aika kairake, taan reirei, ao ibonga imarenan 12 ao 19 te ririki.

Ko na bae n iangoa te katauraai n te nakoanibonga n aron are e kakaraoaki n te Nakoanibonga n ana ririki te Aaron. Ma Tamara are i Karawa e a tia ni katauraaira man ngke ti reiakinaki Irouna n Abanueana imwain ae ti bungiaiki. E katauraaira n te tairiki aei. Ao E na reitinako ni katauraaira ngkana ti butimwaea.

Oin te katauraai ni kabane n te nakoanibonga, n te maiu are imwain aei ao n te maiu aei, bwa e na kariniira ao naake ti beku Ibukina ibukin te maiu ae akea tokina. Tabeua moan reirei n te maiu imwain te maiu aei e kairii babaire n te kamaiu, ma Iesu Kristo ao Ana Mwakuri ni kamaiu bwa botona. Ti aki tii reiakinaki te babaire ma ti reiakinaki taabo ake tina rineia.

Ibukin te rabuna n te mwamwaninga e katukaki iaon ara iango ni bungiakira, ti riai ni kakaeta te kawai ni manga reiakinna n te maiu aei tera are ti a kaman ataia ao ni kawakinna. Iteran ara katauraai n te maiu aei bwa tina kunea te koaua ae kakaawaki bwa ti aonga ni kona ni manga kabaeaki nako iai man berita aika tabu. Ane e kainnanao te animaki, te nanorinano, ao te kaunganano n ara itera ao riki te ibuobuoki mai irouia aomata ake a tia ni kunea te koaua ao ni manga tibwaia ma ngaira.

Aomata akanne a kona n riki bwa ara karo, mitinare, ke raoraora. Ma te ibuobuoki anne bon iteran ara katauraoi. Ara katauraoi n te nakoanibonga n taai nako e kairiia tabeman ake a tia ni kaman tauraai n anganiira te tibwanga ni butimwaea te euangkerio ao imwiina n rineia ni karaoia man kawakinan berita aika a tabu bwa a na rin taeka aikai nako nanora. Ibukira bwa ti na karinaki ibukin te maiu ae akea tokina, ara mwakuri ni ibuobuoki n te maiu aei e riai ni kairaki ma nanora ni kabane, kantaninga, iango, ao te korakora ni katauraioia tabeman ma ngaira n okira te Atua.

Ngaia are iteran te katauraoi n te nakoanibonga ti riai n te maiu aei ni karekea te beku ao n reireiniia tabeman. E kona n nanonaki te riki n tia reirei inanon te Ekaretia, kaaro aika tangira man wanawana, membwa n te kooram, ao mitinare ibukin te Uea Iesu Kristo. Te Uea e na anga te tibwanga, ma arora n tauraai e na nakoiria. Au kantaninga n te tairiki aei bon katerean tabeua rinerine aika kakaawaki ibukin te katauraoi ae nakoraai n te nakoanibonga.

Rinerine aika raraai are mairoun te aomata are e kataneiai ao temanna are e kataneiaki e tei iaon tabeua ataakin aron te Uea ni katauraioia Ana toro n te nakoanibonga.

Te moan, E weteia aomata, kairake ao ikawai, aomata ake a bia kaoti nakon te aonaaba, ao nakoia naba naake, a mamaara ao a aki kaubwai. Te Uea e kona ni bitii kairua akanne nakon te korakora. Anne e na bita aron te tia kairiiri ae wanawana n rineia bwa antai ae e na kataneiaa ao e kanga aron te kataneiai. Ao e kona ni bitii aroia taan taua te nakoanibonga ni kaeka nakon waaki ni karikirake ake e anganaki.

Ti na iangoi tabeua katotoo. Ngai bon te ibonga ae akea au atatai n te uote ae bubura. Au bitiobi e weteai iaon te tareboon ni bwakantaain te Kaonobong teuana. Ngke I kaeka, e taku, “Iai am tai n airi ma ngai? I kainnanao am ibuobuoki.” E ti kabwarabwara bwa e tangirai bwa n na nako n toanna ni kawara te aine are I aki kina, ma akea kanana are e kainnanao aron reiakinana ni katamaroa riki kawakinan ana mwane.

Ngkai, I ataia bwa iai uoman ana kauntira aika taneiai n ana bitiobiriki. Mwaane aikai a ikawai ao a mwaatai. Te kauntira temanna iai ana bitineti ae bubura are imwiin te tai e a riki bwa te beretitenti n te mition ao te Tia Kairiiri ni Kabuta. Te kauntira are temanna bon te tia moti ae rang kinaaki inanon te kaawa.

Ngai bon ana moan tia ibuobuoki te bitiobi ae tibwa weteaki n te kooram n ibonga. E ataia bwa I ata teutana taekan reirei n te warebea. E rangi ni karako au atatai ni kawakinan te mwane. I bon tuai ni korea te tieke; akea Au akaunti; I tuai n noora te kataumwane ae onoti. E ngae n anne, n aki tara au konabwai, I namakinna bwa e bon kananona ngke e kangai, “I kainnanao am ibuobuoki.”

I a ota n te bwai are e kananona te bitiobi ae wanawana. E noria irou te tibwanga ae tamaroa ni katauraoui nakon te nakoanibonga. I kakoaua bwa e aki noora te ataeinimwane ae tuai ni kataneiaaki n riki n taai aika ana roko bwa te membwa n te Bitiobiriki n Tararua. Ma e kairai n te bong anne, ao ni boong nako are I a kinaa iai inanon ririki , bwa te tai ni karikirake ni katauraoui ibukin berita aika a korakora.

E tara n unga iai, ma e mwakuri ae nakoina. N okira nakon mweengara imwiin kawarakin te aine ae kainnana ae mate buuna, e katea ana kaa. E kauka ana boki ae rawata mwakenana ae tinebu. Ao e anganai kaetakiu ma te akoi. E tuangai bwa I riaini ni kamatebwai booki aika a tabu ao n reiakina riki ae mwaiti. Ma e na riaini ni kaman noria bwa I mamaara man karako au atatai ao ni kainnanao te reiakinaki. Ni karokoa te bong aei I uringa te bwai are e reireiai n te bwakantaai anne. Ma iaona riki I uringa aron ana kakoaua ae kakawaki n te aro are I kona n reiakinna ao n tamaroa riki—ao bwa I konaa.

E noria iaon te koaua are antai ngai ni kona ni karekea te konabwai iroun temanna ae namakina te mamaara ao te aki kaubwai ni kona n tangira ana ibuobuoki te Uea ao ni kakoaua bwa e na roko n taai aika a na roko.

Bitiobi, beretitenti n te mition, kaaro a kona n rinei ni beku n aron akanne. I noora rikina ae ai tibwa ngkai n tain te bootaki n aki mamatam n aroia riikan n te kooram ni beretitenti ngke e kaota ana koaua. E nang riki bwa te tia reirei ao e nang kitaniia kaain ana kooram. Ao e taekinna n ana kaoti koaua ngke e weteaki bwa te beretitenti, bon te kanikina mairoun te Atua n nooran riaina

E kakoaua n te namakin ae korakora ni bwanaana n rikirakena n te raoiroi ao te mwaaka irouia ana membwa n ana kooram. I tuai man ongongo bwanaan te aomata ni kamoamoaka kakannaton riki te bootaki nakon are e karaoia. E kamoamoai aia mwakuri ni ibuobuoki. Ao imwina e taku bwa e ataia bwa e a kona ni buoka te riikan ae boou ngkana a namakina te kaungaaki ibukina bwa e a tia n namakina te kaungaaki ngke e roko inanon te nakoanibonga.

Ana namakin ni mamaara e a tia ni karikia bwa e na nanorinano riki, nanoanga riki, ai ngaia are e kona riki ni kakorakoraia ao ni buokii tabeman. Inanon ririki akana uoua inanon te nakoanibonga ae te Aaron, taraakina irou e a tia n rangin mwaatai ao ni wanawana. E reiakinna bwa e a tia ni buokaki n aron te beretitenti n te kooram ni kaitiakaki ana ururing ni kainnanona ngke uoua te ririki n nako. Ana kakaewenako ni boong aika imwaira inanon ana kairiiri ao ngaira e na roko ngkana a tabe ni bua ara ururing ao ni wariki inanon taai ao ara tokanikai.

Bauro e bae n tia n noora te kanganga anne iroun toana ae kairaki n te nakoanibonga, Timoteo. E kaunga ao e kairia n oin ana katauraoi n te nakoanibonga ao ni buoka te Uea ni katauraomia tabeman.

Kakauongo nakon te bwai are e taekinna Bauro nakon Timoteo, toana ae ataei:

“E na tai taku temanna bwa akea bongam, ngkai te rorobuaka n ataei ngkoe, ma ko na riki bwa aia tia kakairi aomata aika onimaki, n te taeka, n te aro ni maeka, n te tangira, n te tamnei, n te onimaki, n te itiaki.

“Ko na tabe n te wareboki, ma te taetae ni kakorakorai nanoia aomata, ma te reireia ni karokoia

“Tai aki mutiakina te bwai n tituaraoi ane i nanom, ane ko anganaki n te taetae ni burabeti ma katokani baiia. ...

“Ko na tarataraiko ao taratara te reirei;1 ko na memena ni baikai; bwa ngkana ko karaoa aei, ao ko kamaiuko iai ma ake a ongo iroum.”2

Bauro e anga te reirei ae tamaroa nakoira ni kabane. Tai raraoma n aki konabwaim ke are ko iangoia bwa antai ngkoe, ma iangoa bwa tera, ma ana ibuobuoki te Uea, ae ko kona n riki iai.

Te reirei are e kaungaira Bauro bwa ti na kakukureira n ara katauraoi n te nakoanibonga bon ana taeka Kristo ao te aro are ti na kona ni karekea te Tamnei ae Raoiroi. Ngkanne ti na atai bwai ake e tangiriira te Uea bwa ti na karaoi n ara mwakuri ao ni karekea te ninikoria ni karaomia, baikara kanganga ake ti kaitarai n taai aika a na roko.

Ti katauraomaki ibukin te mwakuri n te nakoanibonga are e na rikirake riki ni matoa n taina. N aron te katotoo, a na kara ara mwatireti ma kaburorora ngkai ti karaoi. Ara konabwai n reiakin ao n uringi bwai ake ti wareki a na bua. N anga te mwakuri n te nakoanibonga are e kantaningaira te Uea e na raka riki aron kairan maiura ni katoabong ni maiura. Ti kona ni katauraoi ibukin te kataaki man katean te onimaki rinanon ara mwakuri ni katoabong.

Te Uea e a tia n anganiira te tai ni katauraoi n te bwai are e aranna bwa te taeka ni berita ao te berita ae tabu are kaineti nakon te nakoanibonga.3

Bon te berita ae tabu are ti karaomia ma te Atua ni kawakin Ana tua ni kabane ao n anga te mwakuri ni ibuobuoki are E na anga ngke E bon mena ikai. Ni maiuakina rake te

kainibaire n ara kabanea n tamaroa are ti kona ni katea te korakora are ti kainnanaoia n teimatoa iai ni karokoa te toki.

Taan kataneiai n te nakoanibonga aika a korakora a tia ni kaota nakoiu aron katean te korakora anne: bon katean te tokanikai rinanon te maraki ao te maaku are e na bae ni kaira am iango ni katokia. Ana tia kairiri te Uea ae korakora e a tia ni kaota mwaakan te maiu n tamnei are e roko man te mwakuri n te aro are ngke tabeman a karekea te motirawa.

Ngkami taani kairiri n te nakoanibonga aika a korakora ni katea te korakora n te maiu n tamnei anne irouia ami kairake are a teimatoa ni karekea ngkana e mamaara rabwataia.

Tariu ae karimwiiu e mena n te kawa ae uarereke i Utah iaon te bitineti. E tareboniaki n ana outero iroun Beretitenti Spencer W. Kimball. E a bwakanako te tai imwiin te mwakuri ae korakora iroun tariu ao riki nakon Beretitenti Kimball, are e wakina te maroro n te aro aei. E taku, “I ongo bwa ko mena n te taun. I ataia bwa e a bwakanako te tai ao koa wene n te kainiwene, ma ko kona ni buokai? I kainnanaoiko bwa toau ngkoe n noori ni kabane umwantabu n te kaawa aio.” Tariu e iria n te tairiki anne, n akean ana atatai ni karaosan umwantabu ke bwaai tabeua n taekan taian umwantabu ao n akea ataakin Beretitenti Kimball ni kona ni karaoa te bwai teuana imwiin ana bong ae abwabwaki ke bukin kainnanaoan te ibuobuoki.

Ririki ake imwiina I karekea te wewete ae aron anne n te tairiki n te outero i Tiaban. I a riki imwina bwa te kamitina ibukin reirein te Ekaretia n te tai anne. I ataia bwa Beretitenti Gordon B. Hinckley e mena n te tabo teuana n te outero naba anne ibukin tabena nako Tiaban. I kaeka te tareboon are e tang ai tibwa imwiin weneu n te kainiwene ni matu, ni kua imwiin karaosan ni kabane ake I taku bwa iai korakorau ni karaoi.

Beretitenti Hinckley e butiai ni bwanaana ae tamaroa, “E aera ngkai ko matu ngkai I mena ikai ni wareki beebwa ake ti tuangaki bwa ti na rinanoi?” Ngaia are I a teirake n nako ni mwakuri e ngae ngke I ataia bwa Beretitenti Hinckley e kona riki n rinanon beebwa nakon are I kona. Ma e karekea te namakin irou bwa e kainnanao au ibuobuoki.

Beretitenti Thomas S. Monson, n tokina man botaki nako e titirakina te tia koroboki nakon te Moan Beretitenti, “A roroko raoi au mwakuri iaon te tai?” Ao e moangare n tainako ngkana e okiria te kaeka: “O eng, Beretitenti, ko roko.” Moangaren Beretitenti Monson ae kakukurei e anganai te rongorongon. E karikai bwa n na iango, “Iai riki te bwai ae I kona ni karaoia iaon katabeau?” Ao imwiina I okira au aobiti ni mwakuri.

Taan reirei aika korakora a tia ni kaota nakoiu aron te katauraoi ni kawakin tuua ao berita aika a tabu ngkana e nang taraa ni kanganga te tai ao te ririki. A tia ni kaotaai ao n

reireinai aron kairan arou ni mwakuri korakora riki nakon are I taku ngkai I tabe ni karekea te marurung ao te korakora.

I aki kona n riki bwa te toro ae kororaoi ni katoa aoa, ma I kona ni kataia n anga riki te mwakuri nakon are I taku bwa I kona. Ma te anua anne e moantaai ni karikai n tainako, N na tatauraoi ibukin kataakiu rimwi. Ngkoe ao ngai ti kona ni katauraoi ma te korakora ni kawakin ara tua ao berita aika a tabu rinanon te kataaki are a na bon roko ngkai ti a kaniia tokin te maiu.

I noori kakoaua akanne inanon ana Baba ni boowi te Ekaretia ibukin Reirei. Beretitenti Spencer W. Kimball mai ikanne e a tia n anga ririki ni mwakuri inanon nanomatoana n aekakin nako kanganga n te rabwata tii iaon te Mwakuri ae kona n ota. E kaira te boowi n te ingabong anne.

E waekoa n toki n taetae. E bwaka man ana kaintekateka. A maki matana. Atuna e bwaka nako aon bwabwana. I tekateka irarikina. Unimwaane Holland e kaan ma ngaira. Ngaira ake uoman ti teirake ni buokia. N aki taun ara atatai ni kabuanibwai aika a karina, ti kataia n uotia, nakon ana aobiti ae uakaan, ma e bon tabe naba n tekateka iaon ana kaintekateka.

E riki bwa ara tia reirei n te tai anne n tokin kawaina. Ti kaai n tabekia man iteran ana kaintekateka, ti otinako man te ruu ni bowi nakon kawain ana Tabo n Tararua te Ekaretia. E kaurei matana teutana, e bon tanoi , ma e taku, “O, taiaoka taratara raoi. Tai kammarakii nukami.” Ngke ti a uakaan nakon mataroan ana aobiti, e taku, “I rang nanokawaki bwa I uruana te boowi.” Miniti tabeua imwiin karinana n ana aobiti, e tararake n taraira man taku, “Tai iangoia bwa kam na manga oki nakon te boowi?”

Ti otinako ao ni kawaekoaira n oki, n ataakina are rokora ikekei e kakaawaki iroun te Uea. Beriteteni Kimball e a tia ni beku iaon are korakorana riaon tiana n nanomatoa ni beku ao n tangira te Uea. Bon te anua ae e a tia ni kateaki ae matoatoa bwa e mena ikekei ngkana e kainnania. E tauraoui. Ai ngaia are e kona n angareirei ao ni kaotia nakoira arora ni katauraoi ni kawakin tuua ao berita aika a tabu: man teimatoa ni katauraoi inanon ririki rinanon korakorara ni kabane n te bwai are e kaoti ni mwakuri aika a uarereke ma mwiia aika a uarereke.

Au tataro bwa ti na kawakin ara berita n te nakoanibonga ni katauraouira ibukin te maiu ae akea tokina ao ibukiia ake ti weteaki bwa ti na reiakinia. I berita nakoimi bwa ngkana kam karaoui ni kabane ake kam kona, te Atua e na karakai riki korakorami ao wanawanami. E na katauraouiko. I berita nakoim bwa naake ko kataneiaiaia ao ni katei banna ni katotoo ibukiia ana kamoamoara am n aron are I karaouia n te bong aei nakoia taan kataneiaia aika a kakannato ae I kinaiia.

I kakoaua bwa te Atua te Tama e maiu ao e tangiringkami. E kinai ngkami. Ngaia ma Natina ae mimitong, Iesu Kristo, e kaoti nakon te ataeinimwaane ae akea ana atatai, Iotebwa Timiti. A onimakinna ma bwaninin te euangkerio ni Kaokanbwaai ao ibukin koauan te Ekaretia. A kaunga ngkana e kainnania. A anganna namakinan te tangira ae itiaki ngkana e na uotiarikaaki n tabekiarake. A katauraioia ao Ngaiia a katauraioira ibukin te korakora n teimatoa ni mwakuri nakon mimitongin te tiretio are a uaiakinna ao oin aia mwakuri n te nakoanibonga ni kabane.

I katuka iroumi au kakabwaia bwa ko na kona ni kina te tibwanga ae mimitong are e a tia n anganiko te Atua ni wewete ao ni katauraioiko nakon Ana mwakuri ao ni buokiia tabeman. N aran ara tia kairiiri ae tangira ao te tia reirei, Iesu Kristo, amen.

Bwaai aika a na taraaki

1.

Taraa 2 Nibwaai 32:3–6.

2.

1 Timoteo 4:12–14, 16.

3.

Taraa Doctrine ao Covenants 84:39.